

DEO OPTIMO MAXIMO VNI ET TRINO VIRGINI DEIPARÆ.  
ET SANCTO LVCÆ, ORTHODOXORVM MEDICORVM PATRONO.

QVÆSTIO MEDICA.  
QVOD LIBETARIIS DISPUTATIONIBVS MANE DISCVTIENDA  
IN SCHOLIS MEDICORVM, DIE MERCVRII XXIV. NOVEMBRIS  
M. IOANNE DE BOVRGES Doctore Medico, Præsiede.

An obstructio Lienis Chalybs?

989

**L** IENIS dignitas nulla, officium momenti est maximi. Qui publicæ vllius coctionis elaborationisue auctorem illum putat aut officinam, haud fallitur minùs quam qui nullum eius agnoscit vsum. Vt renes sero, cystis felle, sic ille limo sanguinem debet expurgare. hoc eius officium, quo vbi ritè fungitur risus & hilaritatis parens audit non iniuriâ. Sin eo frustretur munere, fletu omnia ac moerore complet. Fæculentus humor à iecore dimissus, nec admixtus à liene vel obstructo, vel imbecilliore, quocunque feratur aliò, nihil non fuscitat luctuosum, refluus in fontem vnde profluxit vitiatâ hæmatosi hydropem minatur. permixtione ac contagio sanguinem inficit, atroque suo colore cutim vniuersam, faciemque ipsam deturpat. si cor attingit aut pulmonem, illic palpitationem, lipothymiam, syncopen, hîc suspirium, suffocationem parit. quin & in supremam vsque mentis arcem aliquando sublatus tenebras illi offundit Cimmerias, vt à rectâ ratione passim aberret, absurdaque ac deliria loquatur & sentiat.

**E** A vitare vis symptomata? Lienis tuere temperiem calidam humidam. Incrementum prohibe paruitate deterius. caue ne decliuus sinistro excidat hypochondrio. sed præcipuam habe curam de conseruanda venarum & arteriarum per fungosum eius parenchyma disperfarum libertate. Ad hæc, purus inspiretur aer ac temperatus. famem & sitim Socratico more labor obsonet, cibus sedet tenuans coctusque facilis, vini oligophori portione comitatus. dupla vigiliarum ad somnum sit proportio. eccoproticis segnior aluus sollicitetur. dicta omnia factaque hilaritate condita sint. immò nec ipsa prorsum venus exulet.

**E** A victus lege ita lien afficitur, vt quidquid in sanguine crassius est ac fæculentum alliciat, allectum subigat, eiusque portione benigniore alatur, reliquam amandet, aut supra in ventriculum, aut infra in intestina, vel in hæmorrhoidas, immò & aliquando in renes ac vesicam. Contrà si carnibus leporinâ, ceruinâ, bubulâ, præsertim murîâ asseruatis, si piscibus maximè cetaceis, si crudis quibullibet, si dulcibus, si lacte aut caseo cibus constet, potus aquâ præsertim palustri. nec interim in labore, somno, venere, &c. ordo teneatur aut modus, prouentum expecta humoris melancholici, cuius copiâ & crassitie lienem statim infarctum, tumefactum, sui que proinde muneris oblitum iri ne dubites. vnde melancholicorum fœtura symptomatum.

**Q** UID opus hîc factò? Sanè obstructantis materiæ crassities incisionem attenuationemque postulat, lentor & adhesio deterfionem. nec ideo filicula, citrigo, fumarîa, capparîs, epithymus, tamariscus, & eiusmodi Splenica putata, inutilia. His humor contumax apparatur ad educationem, feliciùs sennâ phlegmagogâ æquè ac melanagogâ, quàm alio vilo medicamento suscipiendam: sed irritò sæpe conatu, nisi & habitâ partis ratione, rara & foraminosa pumicis instar eius substantia contrahatur, arctenturque pori, sic vt humoris in se reconditi non parum eructet, vique corroboratâ ac concurrente expultrice exprimat in ductus conuenientes, vnde tandem catharsis, blandâ potiùs quàm validâ, foras mittatur.

**Q** UEMCVNQVE sibi Medicus in medendo proponat scopum, remedia quibus eum assequatur nunquam illi defutura. Si minus idonea forsan ea videbuntur, quibus onerata ornataque terræ facies extima est, intima eius adeat penetralia. Illic præter alias opes metallum offendet, non speciosâ formâ, sed moderatè frigidâ siccâque temperie, sed peculiari, & qualem in aliis mixtis reperire non est, aperiendi, constringendi, roborandique vi commendatum. Ferrum aut (vbi scilicet accuratè defæcatum, adeoque medicos ad vsus paulò redditum aptius est) Chalybem nuncupant. Martis illud nomine aut charactere designare ineptû. Ab eo, vt in hypogeis aquæ Forgeses, sic in pharmacopoliis vinum aut aqua, quibus candens extinguitur, vires acquirunt eximias, spleni præ cæteris partibus maximè salutaris. Qui illud idem ignitione pluries iteratâ ex durissimo impalpabilem, ex ponderoso leuem, croceum ex nigricante reddunt, peritos se quidem exhibent artifices, at non feliciùs medentur. Sufficit ablutam aquâ limaturam terendo in pollinem redigere, quem si hepaticis, splenicis, hystericiusue medicamentis aptè permiscueris, pharmaca sanè confeceris efficacissima percurandis ictero vtri que, fœdis virginum coloribus, aliisque ab alui narum partium obstructione natis symptomatis.

Ergo obstructio Lienis Chalybs.

Proponebat Lutetiæ IOANNES DE BOVRGES, Parisinus. A. R. S. H. M. DC. XLIX.

DOMINI DOCTORES DISPUTAVRI.

M. Claudius Tardy.  
M. Ioannes Forestier.  
M. Michaël du Pont.

||  
||  
||

M. Petrus de Mercenne.  
M. Andréas Guyet.  
M. Ioannes Garbe.

||  
||  
||

M. Victor Pallu.  
M. Georgius Ioudowyn.  
M. Hugo Challes.

